

Nuuk, den 5. Maj 2020

UPA2020/73

Inatsisartut Suleriaasianni §36 naapertorlugu apeqquteqaat aallaavigalugu oqallinnissamik siunnersuut imaattoq matumuuna saqqummiuppara:

Soraarnerussutisiaqalernissamut aaqqissuussinermut pinngitsoorani ilaanissaq pillugu apeqquteqaat aallaavigalugu oqallinnissamik siunnersuut.

(Inatsisartunut ilaasortat Hans Enoksen, Pele Broberg, Jens Napätôq, Partii Naleraq)

Tungavilersuut:

Soraarnerussutisiaqalernissamut aaqqissuussinermut pinngitsoorani ilaanissaq pillugu Inatsit 2016-imili inatsisartunit oqallisigineqarluni naammassineqarpoq, inatsillu 1. Januar 2018-imi atortuulerluni.

Partii Naleqqamiit utoqqalinerlut katersisussaataitanermut inatsisip siunertaa paasilluarlugu oqaatigerusupparput. Inuiaqatigiittut ukiorpassuarni utoqqarnut sipaarniarneq aammalumi akiligassat isertitaniit sukkanerusement alliarturnerat qiviaraanni paasinarpoq soq inunnt ataasiakkaanut iluarnerussasoq utoqalinersiutissanik katersinissaq.

Partii Naleqqamiit maluginiarparput nunap inuisa ilarpassui atorfitsik suliffitsillu aqqutigalugu utoqqalinissaminut toqqortereersut, taamaaliornertillu ukiorpassuarni ingerlakkaat.

Inatsisip atulerneraniit maannakkut ukiut pingajussaat ingerlagaluartoq paasinarpoq suli iluatsinnani inuppassuarnit atoruminaatsinneqartoq. Tassami ukioq manna februari aallartereersoq tusagassiorfiit aqqutigalugit tusarparput Akileraartarnermut aqutsisoqarfiup nalunaarutigigaa innuttaasunit inuit 6.628-it suli pisussaaffimminnik naammassinnissimanngitsut. Ukiut arlallit piffissarinikuugaluarlugit erserpoq Akileraartarnermut aqutsisoqarfiup piffissarititap iluani kivissinnaasimanngikkaa innuttaasunut nalunaarsuinissaq, akilersuititsinissaq allaallu aningaasat skat qaffallugu isertitat suli ingerlateqqissinnaasimanagit SISA-mut. Naatsumik taallugu. Nunap inuinit naleqqussagaanngitsumik, allaffissornikkut pisarissersorluta ingerlatsivugut.

Partii Naleqqami inatsisip teknikkita oqallinnermut maanga ilaatikkusupparput. Inatsimmik atuuttitsinermi innuttaasut 6.000 sinnerlugit 6%-imik skattimik qaffaaffigalugit saniatigut 6% katersisussaattillugit, inuit ilaasa isertitamik 54% tungaanut atorsinnaajunnaaraat. Ukiuni tulluittuni taanna kisitsit 64%-imut qaffassinnaasoq. Inuit kaasarfiiniit aallernersuaq unittariaqalerpoq. Aaqqissuusseqqittoqartariaqarpoq.

Aaqqissuusseqqinnissamullu peqataanissarput naatsorsuutigineqassaaq, nunap inuinit naleqqussakkamik takorluugaqareeratta.



partii naleraq

Nunarsuarmi tuniluunnersuaq, covid-19-ip aningaasarsiornikkut annertoorejussuarmik sunniuteqartussaanaera, tamatumalu ukiuni arlalinni aamma nunatsinni atuuteratarsinnaanera sillimaffigissavarput. Eqqaamatigu nunarsuarmi aningaasarsiornerup ajortoornera nunarsuarmi sumiikkaluaruttaluunniit malugisussaagatsigu, minnerunngitsumik niueqatigiinneq, takornariaqarneq, angallanneq assartuinerlu eqqugaatillugit. Nunatsinnilu sunniutissaa piareerssimaffigisinnaaniarlugu pissusissamisoortutut Partii Naleqqami nalilerparput, nunap inui siunissamut ungasissumut katersisussaataatanik ullumikkut nerisassanut atorsinnaassallugit isertitatik. Soorunami akissaqaraanni, piumagaanni, suli periarfissaavoq utoqqalinersiutissamut ileqqaarinissaq. Inuttummi tamatta assingiinneqqaagut, inuullu kiffaanggissuseqarluni katersisinnaanera aamma killilerusunnngilarput.

Soorunami tamakku tamarmik nalilersuutigineqartariaqarput, sutigut tamatigut ingerlatsinermi aamma utoqqarnut politikki qanoq ittoq ingerlatissallugu aalajangertoqartinnagu. Inatsisartut, eqqarsarluartariaqarpugut suut tamaasa ajunngitsumik ingerlasutut isiginerat tamaannga killeqartariaqarpoq, inuinukku pineqartut, inuinukku inuuniarnerat pineqartoq.

Taamaasilluta Partii Naleqqamiit oqallisissiaralugu siunnersuutigaarput inatsisartut Soraarnerussutisiaqarnissamut aqqissuussinermut pinngitsoorani ilaanissaq pillugu Inatsisartut inatsisaat nr. 21, 28. november 2016-imeersoq piaarnerpaamik atorunnaarsinneqarallarnissaa.

Neriuppugut oqallisaaruterput Inatsisartunit Naalakkersuisuniillu ilassilluarneqarumaartoq.

Oqallisilluarisi !